

Djoà dû tin pachâ

Can oun îre crouè, falîye djûë avouë chin qu'oun aey dejö a man. Tsîquye cheyjon vinyey avou' é chyô djoà. I cheyjon que noj' achyée méi de tin po cajanâ îre i tsatin éná û maïn. A rîste dû tin falîye toutoun aâ à écoûa é idjyë é parin û pîlo. Mà chobrâye i démécro é i dechândo apréi-denâ é i demîndze.

Éná po maïn, no djûechën à "porta-gàdzo." No plantechën oun piquyë û méytin d'oun prâ é n'atatsechën oûna cörda bramin òndza. Û pyâ dû piquyë, tsacoun, tsacoûna pojâe oun alon. Youn tinyey a cörda po son é dejej: "*Pörtâ-gàdzo, bâle më oun gâdzo ét ëngadjyâ.*" Tsîquye djûœu éproâe d'aâ bretchyë oun alon chin che féire totchyë pe chéi que tinyey o cordéi. Che che fajey apiyë, i déey mètre oûn'âtra broûa da chävoua rejërve û bën oun alon qu' y aey chû yuî. Can é maton an pâ méi qu'oun alon, o canisson (i cätsebënbën), déan chörtî dû djoà. Po é mâte, îre douj alon, i pouan vouardâ a camisole. Pâ quechyon de che mètre marenû, méimo ëntre crouè. De tôte fasson, n'aran jaméi oujâ, n'irechën èrgognœu é n'aéchën bien acœutâ é recoumandachyon da groûcha.

Pindin que no vouardechën é àtse, no djuëchën û "repïoupiou" avouë de doînte perète. Can é bîtchye iron éyno, no pouëchën féire oun poûtse à dou. Ch'y aey de dzouëno frâno, no rapachechën éná é no noj' acouëlechën derën o vouïdo ën noj' acrotsin à oûna oûcha méi suïda.

Can, û bon dû dzo, é àtse iran û bœu, no vouàjechën féire é cörche de batô ch'o bi. Derën a dzœu, no djûechën à dînâ é chapën û é àrje, ën acouelin de barû. Avouë de böne oûche de frâno û de cûdra, no scultechën de àtse que no mètechën barâ ën éje tinyin pé man. "*Féé, che vo queryâ pâ féé, djûo fran pâ méi*" îre chin qu'oun dejej ën djûin à catchyë, can oun îre decoradjyâ de pâ troâ éj'âtre.

I bague-d'ö, chœutâ-berâ, i man tsàda, i möta-dûra, é bîye, é boton, chin îre d'âtre djoà. Djûë a cocon pourey, i couën déan élîje, à darî-cou, û tsapafou, û s'anfuî-vîa, û blocus, û balon, û carâ, Éj idé mancàon pâ. Méi tâ chon inyû é prûmyë cajën en fé û ën plastiquye.

Texte Maurice Michelet (Février 2009)